

## Timoti

<sup>1</sup> une ne Poulo ne n'sung'hwa ghwa Yeesu Kilisite kulingana nululaghilo lwa Nguluve nu mpoki ghwitu nu Yeesu kilisite juno luhuvilo lwitu. <sup>2</sup> nikukulembela uve Timoti ghwe mwanango ghwa kyang'ani muvuvangilanisi vwa lwitiko. ulusungu ni lipyana nulutengano kuhuma kwa Nguluve uNhaata na kwa Yesu kilisite uMutwa ghwitu fivisaghe numue. <sup>3</sup> ghukalaghe kulikaaja lyä efeso, ndavule nikakusumile ye nivuka kuluta kukighavo ikya makedonia, kuti uvakanaghe avanhu vanovivulanisia mbulanisio isa vudesi. <sup>4</sup> valeke kugadilila ifipango ifisila luvumbulilo, namatavua gha fisina fya vakuulu amasila vusililo. ifio gefino fipela kukaning'ana nafikuvatanga avanhu kukumwitika uNguruve ghwa lwitiko. <sup>5</sup> uvufumbue vwa ndaghilo siitu kwekuti avitiki vaghananaghe nu mwojo um'balafu, ni nyivonelo inofu, nu lwitiko ulwa kyang'ani. <sup>6</sup> neke vamonga vasilekile isio, vagalwike vingile mujova amasio amasila luvumbulilo. <sup>7</sup> vilonda kuuva vavulanisi va ndaghilo sa Moose, napano sino vijova nakusimilisia navasitang'hanie. <sup>8</sup> neke tukagwile kuuti indaghilo sa Moose nofu, nave umuunhu ikusivingilila muvughane vwa Nguluve. <sup>9</sup> kange tunoghiile kukagula kuuti indaghilo nasivikilue kuvagholfu, looli kuvagalusi navano navakundi, kuvahosi navano navikufuunya kwa Nguluve, kuvalamafu

navano navimike, kuvano vibuda avaviise na vang'hina, nambe vanoviduda avanhu avange. <sup>10</sup> kange sivikilue kuva vwafu navano vivwafuka avaghoosi navaghoosi vanine, vano vikwuvila avanhu na kukuvaghisia kuvukami, avadeis na vano vijiigha isa vudesi, palikimo nisingi sooni sino nasikwiting'ana ni mbulanisio isa kyang'ani. <sup>11</sup> imbulanisio isio sili muMhola inofu, jino jihusia uvuvaha vwa Nguluve, juno ighinisivua. ijojino nifumbatisivue nu Nguluve nipulisyaghe. <sup>12</sup> nikumhongesia uYeesu Kilisite uMutwa ghwitu juno amheliile ingufu, ulwakuva alyang'hagwile kuva m'bomba mbombo nnofu. akam'biika mumbombo jaake, <sup>13</sup> napano ulutasi nilyamulighile na kukumpumusia na kukuvalemasia avaanhу vaake. akasungukila ulwakuva nikavombagha isio muvujasu na muvusila lwitiko. <sup>14</sup> kange uMutwa ghwitu alyasungukiile kyango, akamheela nu lwitiko nulughano luno luli mwa Yeesu Kilisite. <sup>15</sup> ili lye lisio lya kyang'ani, lino avanhu vanoghile kukulyupila, kuuti uYeesu Kilisite alisile muiisi avapoke avahosi. muvahosi avuo, une nene muhoka makole kukila vooni. <sup>16</sup> kuuti, vwimila une ahufie ulugudo lwake lwooni. pe niive kighwani kuvano vilikumwitika na kukupila uvwumi uvwa kuvusila kisila. <sup>17</sup> liino uvwoghopua nu vuvaha vuli nu mwene ifighono fyoni, uNtwa un'sila kusila juno uvufue navukumwagha, kange naivoneka, uNguluve ghwe jujuo mwene Ameni. <sup>18</sup> mwnango Timoti, ululaghilo uluo luno nikukupeela, luling'iine na masio amalongosi agha vuvili ghano ghalyajovilue vwimila uve.

**19** amasio aghuo ghakutangaghe kuvomba im-bombo ja Nguluve nambe luve lutalamu ndaani, ndaule umulwalilugu unnono vule itenga ililugu nambe liive litalamu ndaani. **ugadililaghe ul-witiko na kuuva ni nyivonelo inofu.** **20** avanhu avange navivikila mwojo kuvomba sino va-sitang'inie kuuti sa kyangani, uluo lukuvapelela kuvuhiila kukumwitika uNguluve. Muvanhу avuo mwale uHimenaayo nu Alekisanda. avuo nimulekile usetano kuuti vamanyile, valekaghe kukum'benapula uNguluve.

## Sura ya 2

**1** ululongosi musooni nisuma munsumilani-laghe kwa Nguluve. munsumaghe uNguluve kuuti, avatange na kukuvasunya avanhu vooni kange, uNguluve vwimila avanhu vooni. **2** lunoghiile kukuvasumila avatwa na vange vooni avanya vutavulua, neke tukalaghe nulutengano, pano tukumwimika uNguluve na kuuva na maghendele amanofu. **3** ulu lwe lunono luno uNguluve uMpoki ghwitu ikeela **4** UNguluve ilonda avanhu vooni vapokue nakuk-agula uvwakyang'ani. **5** tukagula kuuti isio sakyang'ani, ulwakuva uNguluve ali jumo kange unya kuvasambania avanhu nu Nguluve ali jumo ujuo ghwe munhu uYeesu Kilisite. **6** juno alyahumisie uvwumi vwake kuuti avavange avanhu vooni. **uvu vwe vwolesi vuno uN-guluve alyatupelile munsiki ghuno alyatavi-ike.** **7** neke mu uluo nilyavikilue kuuva n'daliki na kuuva nsung'hwa, nanidesa ni-jova isa kyang'ani. kange nilyavikilue kuuva

m'bulanisi ghwa vano navaYahudi kuuti nipulisyaghe imhola ja lwitiko nu lwakyang'ani. <sup>8</sup> lino panomukong'anile, nilonda avakinhaata pano panovikwinula amavoko kukyanga kukuunya, vavisaghe ni nyivonelo inofu, vifunyaghe kisila ng'alasi nambe kukaning'ana. <sup>9</sup> nava vaki-juuva vafyalaghe vunono amenda, vavisaghe nu luveelo ulunofu. navangakelaghe ulutogo ulwa ulwakitiva ilinyele, nambe ulwakufwala ifinu ifya kyuma na fino filengadika, nambe amenda agha ndalama nyinga. <sup>10</sup> looli vavisaghe na maghendele amanofu ndavule lunoghile kuvakijuuva vano vano viitile kukufunya kw Nguluve. <sup>11</sup> avakijuuva vavisaghe vapuliki, kange vakundi pano vimanyila. <sup>12</sup> nanikumpela umukujuuva uvutavulua ulwakuyulanisia nambe kukuntema umukinhaata. looli avisaghe mpuliki. <sup>13</sup> ulwakuva uNguluve alyampelile uAdamu taasi, pambele uEefa. <sup>14</sup> kange uAdamu naalyasangilue, akadenya ululaghilo lwa Nguluve. <sup>15</sup> neke nave umukujuuva ilikwupila uvupoki vwinila uvupaafi vwake nave ikukala mulwitiko, mulughano, muvwinike na kuuva nu luveelo ulunono.

## Sura ya 3

<sup>1</sup> ilisio ili lya kyang'ani, "umunhu juno ilonda imbombo ijakuva muloleleli ghwa kipugha kya vitiki, ujuo asalwile imbombo inofu." <sup>2</sup> kwekuti umuloleleli ghwa kipugha kya vitiki, avisaghe munhu juno naipikua, juno nam'bwafu,"unya kukughela kange unya kukulolelela, umunhu ghwa vutavike, ntengeleli, juno

akimanyile kuvulanisia <sup>3</sup> aleke kuuva mughasi, aleke kuuva nyamabatu, avisaghe muhuugu. kange nangavisaghe muhojofu ghwa ndalama. <sup>4</sup> avisaghe muunhu unyakwimila vunofu in-yumba jaake, juno akimanyile kuvunga avaana muluveelo ulunofu, kange voope vikumpulika. <sup>5</sup> kwekuuti umunhu junoikunua kukwimilila unyumba jaake jujuo, ndepoonu ikwimilila ndaani ikipugha kya vitiki? <sup>6</sup> kange nangavisaghe muunhu juno nanga asyetukagha, ulwakuva kyaikughinia. ulughinio uluo lukumpelela kukwingila muvuhighi ndavule alyahighilue uSetano. <sup>7</sup> looli, avisaghe muunu juno ikwolekua vunofu nambe na vapanji, kuuti aleke kupikua na ghwilila mulutegho lwa Setano. <sup>8</sup> navatangili vavisaghe vagholofu vano navasyetung'ani, navaghaasi, valekaghe kuuva vahojofu va ndalama. <sup>9</sup> looli vavisaghe vaanhу vano vigadilila uvwakyang'ani vwa lwitiko lwinu nu mwojo um'balafu. <sup>10</sup> voope ava vaghel-waghe taasi, neke vangavoneke kuuti vanoghiile, vavombaaghe imbombo ijio. <sup>11</sup> navadala vaave vavisaghe nuluveelo lunofu, vano navadesi, vano vikughela, kange vavombi vanofu mu-sooni. <sup>12</sup> avtangili valekaghe kuuva vawwafu, ulwene vavisaghe vaanhу vano vikwimila vunofu avaana vaake nasi nyumba saave. <sup>13</sup> vano vivomba vunofu imbombo ija vutangili, viiva voghopua. apuo viiva ni ngufu kupulikisia imhola ija lwitiko lwitu mwa Yeesu Kilisite. <sup>14</sup> nikuvalembela amasio agha, kumo nihuvila kukwisa kulyumue munsiki n'debe

ghuno ghukwisa. <sup>15</sup> neke nambe nidiile, uk-agulaghe sino sinoghiile kuvomba munyumba ja Nguluve, jino kye kipugha kya vitiki va Nguluve juno mwumi, mbanda, kange lwako lwa kyang'ani. <sup>16</sup> kyang'ani, sino uNguluve atuhufisie m'baha, soope se isi. uNguluve akivonesia mulwa m'bili, akalekua nu Mhepo kuuva mugholofu, akavoneka, akapulisivua mu-fisina fyoni, avaanhу ava muiisi vakamwitika, akatolua kuluta kukyanya muvuvaha.

## Sura ya 4

<sup>1</sup> neke uMhepo ijoba kisila kufisa kuuti, ifighono ifya vusililo vamonga vivuhilagha kuvigilila uvwakyang'ani vwa lwitiko, neke vivingililagha imhepo isa vusyangi, ni mbulanisio isa Setano. <sup>2</sup> avaanhу vano vivulanisia isio ve vakedusi, kange vadesi vano inyvonelo saave sifwile. <sup>3</sup> avua vikuvasigha avange kuuti valeke kutolana, nambe kulia ifyakulia fimonga, fino uNguluve alyafipelile kuuti, avitiki vafyupilaghe nu luhongesio, ulwakuva vavutang'hinie uvwakyang'haani. <sup>4</sup> ifipelua fyoni ifya Nguluve finofu, jeeje kukaana kimonga, looli fyupilwaghe nu mwojo ughwa luhongesia. <sup>5</sup> ulwakuva sino uNguluve ijoba mulisio lyake, ni nyifuunyo siitu isa luhongesio, fihu-fia kuuti ifio fyitikisivue. <sup>6</sup> ungavapeele avitiki imbulanisio isio, apuo pe ghuuva m'bombi nnofu ghwa Yeesu Kilisite, kange ghuuva ukuliile vunofu muvwakyang'ahaani vwa lwitiko lwitu na mumbulanisio inofu sino uve usivingiliile.

<sup>7</sup> uve ufileke lwoni ifipango ifya vakuulu ifisila luvumbulilo, neke jaatu ughimbaghe kukukala muvughane uvwa Nguluve. <sup>8</sup> kukughuhonga um'bili kuuva ni ngufu, kwelule uluvumbululo, ludebe, kwe kukangasia um'bili ghake. na looli, kughimba kukufunya na kukum'bingilla uNguluve, luvumbulilo kukila sooni. ulwakuva ulu lukuatupeela ulufingo ulwa kukava uvwumi uvwa lino na vuno vukwisa". <sup>9</sup> ilisio ilio lya kyang'ani, lino avaanhu vanoghiile kukulyupila. <sup>10</sup> mu uluo tughimba na ku-vomba imbombo, ulwakuva tukumuhuvila un-guluve juno mwumi, uMpoki ghwa vaanhu vooni vano vikwitika. <sup>11</sup> isio se sino un-oghiile kukuvavulanisia na kukuvalaghila avi-tiki kuuti vasivingililaghe. <sup>12</sup> nambe avaanhu vikukuvona ulin'debe, ulekaghe kukulekelesia vakubenaapule, ulwene uve ughimbaghe neke uvusaghe kihwani kuviti munjovele, mumaghen-dele, mulughano, mulwitiko na muvugholofu. <sup>13</sup> ughimbaghe kukuvimbila avaanhu aMalembe aMimike, kange udalikilaghe na kuvulanisia kuhanga pano niliiva nisile. <sup>14</sup> ulekaghe ku-vuhila kukukivombela ikipugha ikipelua kino uNguluve akupeliile uvwimila amasio gha vavili, na pano ghwalyimikue na valoleleli va kipugha kya vitiki. <sup>15</sup> ughimbaghe kuvomba isio nu mwojo ghwako ghwoni. kuuti mu-vwumi vwako avaanhu vooni vajaghaghe im-bombo jaako. <sup>16</sup> ghulolelelaghe amaghendele ni mbulanisio saako. nungilamwaghe, ulwakuva pano ghuvomba isio ghukulusia uvwumi vwako nu vwa vano vikukupulikisia.

## Sura ya 5

<sup>1</sup> ulekaghe pikun'dalikila umunhu un'goyo, looli um'bulaghe hwene mpafi ghwako. avadiimi ujovaghe navo hwene vanino. <sup>2</sup> nava vahinja, uvavombelaghe muvunofu vwoni hwene valumbulio. <sup>3</sup> uvavulaghe avitiki kuuti, vavatangaghe avakijuua avafwile avasila lutango. <sup>4</sup> neke umfwile ghweni juno ali na vaana nambe avisukulu, avuo vamanyilaghe taasi kuvomba sino sinoghile munyumba saave. vavavombelaghe avapafi vaave, ukuo kwekugomosia sino voope vavombilue. kuvomba uluo kwekuno uNguluve ikeela. <sup>5</sup> umukijuua umfwile juno naali nu muunhu ughwa kuntanga, ujuo ikumuhuvila uNguluve, ikufuunya na kusuma ulutango kwa Nguluve pakilo na pamwisi. <sup>6</sup> looli umukujuua umfwile juno ikeela uvunoghekua vwa iisi, ujuo mfue napano ivoneka mwumi. <sup>7</sup> soope isio uvavuule avitiki kuuti valeke kupikua. <sup>8</sup> neke umuunhu ghweni juno naikuvatanga avaanhу vaake, kyonga ava munyumba jaake, ujuo iiva alulekiile ulwitiko, iiva m'biivi kukila umupanji. <sup>9</sup> umfwile anoghiile kuuva muvutavike vwa vafwile, nave ali na maaka kutengulila ifijigho ntanda, kange na m'bwanfu." <sup>10</sup> olekwaghe vunofu, ndavule avisaghe asungile avaana vaake vunofu, atengeliile avagheesi na vitiki, avatangile vano vupumusivua, kange avombile imbombo sooni inofu. <sup>11</sup> looli avafwile avajeela, nungavupilaghe muvutavike, ulwakuva uvunoghelua vwa m'bili vukuvaghigila kukila kukutavula kwa Kilisite,

apuo vilondagha kutolua. <sup>12</sup> mu uluo viiva vikwingila muvuhighi, ulwakuva vavulekile ulufingo lwave kwa Kilisite, ulwakujigha kisila kutolua kange. <sup>13</sup> palikimo nuluo, vimanyila uwwolo panovighendaghenda munyumba isa vaanhу. nakwekuti vuvwolo vwene, kange viiva vaheehi na kuhanga mumbombo isa vange, nu vuholiholi na kujova sino nasinoghiile. <sup>14</sup> lino, une nikeela avafwile avajeela, vatolwaghe vapapaghe avaana na kulolelela inyumba saave, neke avalugu valeke kukuvajova fivi. <sup>15</sup> ulwakuva avafwile vamonga vasovike, vikum'bingilila uSetano. <sup>16</sup> nave umukijuuva umwitiki ali na vafwile munyumba jaake, avatangaghe, kuuti ulukong'haano luleke kukwangilua. neke ulukong'haano luuva nu vweleefu uvwa kuvatanga avafwile avange avasila lutango. <sup>17</sup> avaloleleli va lukong'haano, vano vivomba imbombo vunofu, voghopwaghe na kuhombua vunofu," kyongo vano vikuhumia kudalikila na kuvulanisia. <sup>18</sup> ulwakuva lilembilue muMalembe aMimike kuuti, ulekaghe kukujibunga ing'ombe umulono, pano jisyonda ingano paluvugha. kange lilembilue, um'bomba mbombo anoghiile kuhombua uluhombo lwake." <sup>19</sup> ulekaghe kukwitika inongua sino sijovua vwinila umuloleleli ghwa lukong'haano, kisila vwolesi vwa vaanhу vavili nambe vatatu. <sup>20</sup> looli avaloleleli vano vifihoka amakole, uvadalikilaghe pavinga, kuuti avange voghopaghe. <sup>21</sup> nikukulaghila pamaso gha Nguluve, na pamaso gha Yeesu Kilisite na vanyamhola avasalulua kuuti,

ugadililaghe aghuo, ulekaghe kuhigha ng'hani ng'hani kisila kulutang'hinia nambe kutangila lubale. <sup>22</sup> nungamwitikisyaghe ng'haning'hani umuunhu pikumwimika pa mbombo ja Mutwa, ulwakuva ungam'biike umuhosi pa mbombo, najuuve ghuuva uhangile amakole ghaake. uve ghulolelelaghe uvwumi vwako, uvisaghe mugholofu. <sup>23</sup> kuhuma lino, nunganywisaghe amalenga gheene, looli unywisaghe nu luuhuje ludebe vwimila inhamu jaako ija lileme ni nhamu isingi sino sasikukugasia. <sup>24</sup> nungavitikisyaghe ng'hani ng'hani avanhu pa mbombo ja Mutwa, ulwakuva avanhu avange, amakole ghaave, ghali pavuvalafu, ghikuvalongolela kuvuhighi. neke avange, amakole ghaave ghafisiime, ghivoneka pambele. <sup>25</sup> enendiki, imbombo inofu sivoneka pavuvalafu, soope sino sifisiime sihanga sivoneke.

## Sura ya 6

<sup>1</sup> avakami vooni avitiki, vijisyaghe kuvavombelua vaave, kuuti ilitavua lya Nguluve ni mbulanisio siitnasingabenapulwaghe. <sup>2</sup> avakami vano avavombelua vaave vitiki, valekaghe pikuvabenapula ulwakuva va kipugha kimo. ulwene vanoghile kukuvalombela, vunofu na pikila, apuo viiva vikuvatanga avajanave mulwitio, kange avuo vaghanike vaave. isio uvulanisiaghe na kupavila. <sup>3</sup> kwevale avanhu vano vivulanisia imbulanisio sa vudesi. sino vivulanisia nasikwiting'hana na masio amanya vwumi agha Mmutwa ghwitu

uYesu Kilisite, kange nasikwiting'hana nu vwinike. <sup>4</sup> avuo vamemile ulughinio, kange navakagwile kimonga. avanhu avuo vikwumilila mulukaani ulusila luvumbulilo vwinila utusio utudebe. mu uluo jihumila igiila, amabaatu, amaligho, angananio, <sup>5</sup> kange jaatu ghinangania amapuling'ano. avaanhу avuo vanangiike uluhala, vasila vwaykyang'ani visaagha kuuti kuvomba imbombo ija Nguluve je sila ija kukavila ikyuma. <sup>6</sup> ulwakuva ni kyuma luvumbulilo, neke umuunhu iiva nu luvumbulilo ulukome, pano ikumwitika uNguluve na kukwilana ni fiinu fino ali nafyo. <sup>7</sup> ulwakuva muiisi muno natwalisile na kimonga, kange natungavuuke na kimonga, <sup>8</sup> looli tungave ni kyakulia ni fya kufwala tukwilanaghe nifio. <sup>9</sup> neke vavo vali nu vunoghelua uvwa kyuma vwinila mungelo, nakughwilila munhegho na muvunoghelua uvwa kijasu vuno vukuvanangania. uluo lukuvapelela kupumuka kyongo. <sup>10</sup> ulwakuva kukusighana kyongo indalamu vwe vutengulilo vwa vuvili vwinga. vamonga vinoghilue isio vasyangilue valulekile ulwitiko, pe vali muvuvafi uvukome hwene muunhu juno ikuhoma nu mmaghe. <sup>11</sup> looli uve ghwe muunhu ghwa Nguluve, usikimbilaghe isio. uvingilaghe uvwinike, uvwinike, ulwitiko, ulughano, ulugudo nu vuvgu. <sup>12</sup> ghimbagha kukum'bingilila uNguluve ndavule lutalamu ndaani, neke ukolelelaghe uvwumi uvwa kuvusila kusila, vuno ghwa ghwakemelilue pala panoghwalyitike pavolesi avinga. <sup>13</sup> nikukulaghila pamaaso gha Nguluve

juno ikufiviika fyumi ifinu fyoni, na pamaaso gha Yeesu Kilisite, juno alyajovile uvwolesi uvwa kyanghaani pamaaso gha Pontio Pilato,<sup>14</sup> niiti, ugadililaghe indaghilo isio muvunofu vwoni, kuhanga pano alaava ikwisa uMutwa ghwitu uYeesu Kilisite.<sup>15</sup> kukwisa kwa mwene kulaava unsiki ghuno ataviike uNguluve juno ighinisivua, unya ngufu juno mwene, uNtwa ghwa vatwa vooni.<sup>16</sup> ujuo ghwe juno uvufue navukam'bona, ikalile palumuli luno umuunhu nangaluvelelele. kange nakwale umuunhu juno amwaghile, nambe juno ndepoonu ikumwagha. uwoghopua ni ngufu ali nafyo ifighono fyoni Ameni.<sup>17</sup> vavuule avamofu valeke kukughinia, nambe kuhuviila uvumofu vwake uvwa muiisi iji, vuno vwa nsiki n'debe. looli vamhuvilaghe uNguluve juno ikutupeela iffinu fyoni muvukoola vwake, kuuti tufivombelaghe nu lukeelo.<sup>18</sup> kange avavuule vavombaghe inofu neke vavisaghe vamofu mumbombo inofu ndavile avange vule vamofu mufiinu. vavisaghe vapeesi nakuhangilanila na vange ikyuma kyave.<sup>19</sup> kuvomba imbombo inofu isio, luli ndavule kuvuta iffinu ifya kukutanga unsiki ghuno ghukwisa, ukuo kwe kukuvikila ulwalo ulukangafu ifighono fino fikwisa, apuo pepano valupila uvwumi uvwa kyang'haani.<sup>20</sup> timoteo, gadililagha vunofu uvyakyang'haani vuno upelilue. ulekaghe kukujingisia mumasio ghano nagha Mutwa amasila luvumbulilo na makaning'hano agha kijasu, ghano avange viiti vwe vukagusi.<sup>21</sup> avaanhу avange vano

vasikolile isio, valulekile ulwitiko lwave.  
ulusungu luvisaghe palikimo numue.

**Vwanji Bible  
The New Testament in the Vwanji language of  
Tanzania**

copyright © 2020 Door43 World Mission Community

Language: Kiwanji (Vwanji)

Translation by: Door43 World Mission Community

Contributor: Cloud Roman, ITTO, Mwj. Lucas Ndugu, Tiralaleli Ndugu, Julieth Ngogo, Vwanjimt

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-11-10

---

PDF generated using Haiola and XeLaTeX on 11 Nov 2022 from source files dated 11 Nov 2020

0fe8b31a-d7bb-5580-ae6c-d8de2d786d46